



Կարգապահական գործ թիվ ԿԳ-26004

Հայաստանի Հանրապետության փաստաբանների պալատի
կարգապահական հանձնաժողովի

Ո Ր Ո Շ ՈՒ Մ

**ՓԱՍՏԱԲԱՆ ՔՐԻՍՏԻՆԵ ՆԻԿՈԼԱՅԻ ՊԵՏՐՈՍՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ**

Հայաստանի Հանրապետության փաստաբանների պալատի կարգապահական հանձնաժողովը (**այսուհետև նաև՝ Հանձնաժողով**), Հանձնաժողովի նախագահ՝ Տաթևիկ Շալջանի, Հանձնաժողովի զեկուցող անդամ՝ Գուրգեն Թորոսյանի, Հանձնաժողովի անդամներ՝ Վերոնիկա Ալեքսանյանի, Վահե Աստվածատրյանի, Կարինե Բաղդասարյանի, Միքայել Դանիելյանի, Կարեն Խալաթյանի և Արաքս Վարդանյանի կազմով,

քարտուղարությամբ՝ Մերի Տերտերյանի,

քննության առնելով փաստաբան Քրիստինե Նիկոլայի Պետրոսյանի (արտոնագիր՝ թիվ 3333) (**այսուհետև նաև՝ Փաստաբան կամ Պատասխանող**) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

«ՎԱԼ ՕԹՈՄԵՅՇՆ» ՍՊ ընկերության տնօրեն Վարդգես Գասպարին (**այսուհետև՝ Դիմող**), դիմելով Հայաստանի Հանրապետության փաստաբանների պալատ (**այսուհետև՝ Պալատ**), հայտնել է, որ 18.01.2024թ. Փաստաբանի հետ կնքել է պայմանագիր, որի համաձայն վերջինս պարտավորվել է ներկայացնել Դիմողի շահերը «Գլոբալ Աքսես» ընկերության կողմից պարտավորությունները չկատարելու հարցի շրջանակներում:

Ըստ Դիմողի՝ ծառայությունների դիմաց Փաստաբանին վճարվել է 300.000 ՀՀ դրամ:

Դիմողի պնդմամբ, Փաստաբանը ներկայացրել է հանցագործության մասին հաղորդում, որը քննիչի որոշմամբ մերժվել է: Փաստաբանը քննիչի որոշման բողոքային տարբերակը ստանալուց հետո հայտնել է Դիմողին, որ բողոքարկման օրվան հաջորդ օրը

Թիվ ԿԳ-26004-2-Ա

20.05.2026թ.



են թողնված:

Ըստ Դիմողի՝ Փաստաբանը հայց է ներկայացրել ընդդեմ «Գլոբալ Աքսես» ընկերության, սակայն դատարանի 11.03.2025թ. որոշմամբ հայցը թողնվել է առանց քննության, քանի որ պատշաճ ծանուցված Հայցվորը և նրա ներկայացուցիչը 14.11.2024թ. և 11.03.2025թ. նշանակված դատական նիստերին չեն մասնակցել:

Դիմողը նշել է, որ դատարանի 11.03.2025թ. որոշման մասին Փաստաբանը տեղեկացրել է ավելի քան չորս ամիս ուշացումով, իսկ որոշումը տրամադրել է ավելի քան վեց ամիս ուշացումով:

Դիմողը նշել է, որ այդ ողջ ընթացքում Փաստաբանը դրսևորել է անփույթ վարքագիծ, անպատասխանատու կեցվածք և Դիմողի բազմաթիվ դիմումները թողել է անպատասխան:

Դիմողը խնդրել է հարուցել կարգապահական վարույթ և փաստաբան Քրիստինե Պետրոսյանին ենթարկել պատասխանատվության:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 18.03.2026թ. Դիմողին առաջարկվել է համապատասխան գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Դիմողը հայտնել է, որ բողոքին կից արդեն իսկ ներկայացրել է իր մոտ գտնվող բոլոր նյութեր և լրացուցիչ որևէ ապացույց իր մոտ առկա չէ:

2. Պատասխանողի համառոտ բացատրությունները.

Մինչև կարգապահական վարույթ հարուցելու հարցի լուծումը փաստաբան Քրիստինե Պետրոսյանին առաջարկվել է «Փաստաբանության մասին» օրենքի (այսուհետ՝ Օրենք) 39.2-րդ հոդվածի 4-րդ մասի համաձայն ներկայացնել բացատրություն Վարդգես Գասպարիի դիմումի վերաբերյալ, սակայն Փաստաբանը որևէ բացատրություն և ապացույց չի ներկայացրել:

Միաժամանակ, սույն կարգապահական վարույթի օրինականությունն ապահովելու և արդարացի լուծման համար նշանակություն ունեցող հանգամանքները բացահայտելու նպատակով՝ 18.03.2026 թվականին Փաստաբանին առաջարկվել է՝ Օրենքի 39.5 հոդվածի 5-րդ մասին համապատասխան գրությունը ստանալու պահից մեկշաբաթյա ժամկետում ներկայացնել կարգապահական վարույթի համար անհրաժեշտ ապացույցներ:

Փաստաբանը որևէ բացատրություն և (կամ) ապացույց չի ներկայացրել և կարգապահական հանձնաժողովի նիստին չի մասնակցել:

3. Կարգապահական վարույթ հարուցելու մասին որոշումը.

Պալատի նախագահի 12.02.2026թ. թիվ 94-Ա/ԿԳ-26004 որոշմամբ Փաստաբանը



նկատմամբ Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Փաստաքանի վարքագծի կանոնագրքի (**այսուհետ՝ Կանոնագիրք**) 3.5.5 և 3.6.1 ենթակետերի խախտման հատկանիշներով հարուցվել է կարգապահական վարույթ:

13.02.2026թ. կարգապահական գործի նախապատրաստումը հանձնարարվել է Պալատի աշխատակազմի սպասարկող անձնակազմի աշխատակից Ծովինար Քուրբջանին (**այսուհետ՝ Աշխատակից**):

3.1. Վկաների ցուցմունքները.

Սույն կարգապահական գործով վկաներ չեն հրավիրվել:

4. Կարգապահական գործ նախապատրաստող Աշխատակցի եզրակացությունը և գործի հանձնումը Հանձնաժողովին.

Գործի նախապատրաստման արդյունքում Աշխատակիցը 13.04.2026թ. կազմել է եզրակացություն: Եզրակացությամբ հաստատված են համարվել սույն որոշման 5-րդ գլխի 1-ից 6-րդ կետերում նշված փաստերը:

Կարգապահական գործը Պալատի Հանձնաժողովին է հանձնվել 13.04.2026թ.:

Հանձնաժողովի նիստը տեղի է ունեցել՝ 20.05.2026թ. ժամը 18:30-ին ՀՀ փաստաքանների պալատի վարչական շենքում (ք.Երևան, Զաքյան 7-2, 4-րդ հարկ, թիվ 12 սենյակ):

5. Գործի հանգամանքները՝ առկա ապացույցների վկայակոչմամբ.

Հանձնաժողովը, ուսումնասիրելով գործում առկա ապացույցները, հաշվի առնելով նաև կարգապահական գործը նախապատրաստող Աշխատակցի եզրակացությունը, հաստատված է համարում հետևյալ փաստերը.

1. Փաստաքան Քրիստինե Պետրոսյանը ստանձնել է Դիմող «ՎԱԼ ՕԹՈՄԵՅՇՆ» ՍՊ ընկերության տնօրեն Վարդգես Գասպարիի իրավունքների պաշտպանությունը թիվ ԵԴ2/2552/02/24 քաղաքացիական գործի շրջանակներում: Սույն փաստը հաստատվում է թիվ ԵԴ2/2552/02/24 քաղաքացիական գործով «Datalex» դատական տեղեկատվական համակարգի տվյալներով:

2. Փաստաքանը թիվ ԵԴ2/2552/02/24 քաղաքացիական գործով «ՎԱԼ ՕԹՈՄԵՅՇՆ» ՍՊ ընկերության անունից հայց է ներկայացրել ընդդեմ «Գլոբալ Աքսես» ՍՊ ընկերության գումար բռնագանձելու պահանջի մասին: Սույն փաստը հաստատվում է թիվ ԵԴ2/2552/02/24 քաղաքացիական գործով «Datalex» դատական տեղեկատվական համակարգի տվյալներով, ինչպես նաև փաստը հաստատվում է Դիմողի ներկայացրած թիվ ԵԴ2/2552/02/24 քաղաքացիական գործով «Հայցն առանց քննության թողնելու մեղին» դատարանի 11.03.2025թ. որոշմամբ:

3. Դատարանի 11.03.2025թ. որոշմամբ հայցը թողնվել է առանց քննության,



քանի որ պատշաճ ծանուցված Հայցվորը և նրա ներկայացուցիչը 14.11.2024թ. և 11.03.2025թ. նշանակված դատական նիստերին չեն մասնակցել: Սույն փաստը հաստատվում է Դիմողի ներկայացրած թիվ ԵԴ-2/2552/02/24 քաղաքացիական գործով «Հայցն առանց քննության թողնելու մասին» դատարանի 11.03.2025թ. որոշմամբ:

4. Փաստաբանը ստանձնել է Դիմողի իրավունքների պաշտպանությունը նաև քրեական գործի շրջանակներում և համապատասխան հանցագործության մասին հաղորդում է ներկայացրել ՀՀ քննչական կոմիտեի Երևան քաղաքի քննչական վարչության Արաբկիր վարչական շրջանի բաժին: Սույն փաստը հաստատվում է ՀՀ քննչական կոմիտեի Երևան քաղաքի քննչական վարչության Արաբկիր վարչական շրջանի բաժնի ավագ քննիչ Դ. Գևորգյանի գրությամբ:

5. Փաստաբանի ներկայացրած հաղորդման քննարկման արդյունքում քրեական վարույթ չի նախաձեռնվել, քանի որ հաղորդումը չի համապատասխանել ՀՀ քրեական դատավարության 173-րդ հոդվածի պահանջներին: Սույն փաստը հաստատվում է ՀՀ քննչական կոմիտեի Երևան քաղաքի քննչական վարչության Արաբկիր վարչական շրջանի բաժնի ավագ քննիչ Դ. Գևորգյանի գրությամբ:

6. Պատասխանողի անձը բնութագրող հանգամանքները.

Պալատի աշխատակազմի ղեկավարի կողմից տրված տեղեկանքի համաձայն՝ Քրիստինե Պետրոսյանը փաստաբան է հանդիսանում 06.12.2022 թվականից, և 2022-2026թթ ընկած ժամանակահատվածում չի ունեցել կարգապահական տույժ:

7. Պալատի Հանձնաժողովի պատճառաբանված եզրակացությունը և որոշումը.

Հանձնաժողովը գտնում է, որ փաստաբան Քրիստինե Պետրոսյանը ենթակա է կարգապահական պատասխանատվության՝ Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Կանոնագրքի 3.5.5 և 3.6.1 ենթակետերի խախտման համար:

Օրենքի 19-րդ հոդվածի 1-ին մասի 2-րդ կետի համաձայն՝ փաստաբանը պարտավոր է պահպանել նույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Օրենքի 39-րդ հոդվածի 1-ին մասի համաձայն՝ փաստաբանը ենթակա է կարգապահական պատասխանատվության սույն օրենքի և փաստաբանի վարքագծի կանոնագրքի պահանջները խախտելու համար, ... :

Օրենքի 39-րդ հոդվածի 2-րդ մասի համաձայն՝ Փաստաբանի նկատմամբ կարգապահական վարույթն իրականացվում է օրինականության, օրենքի և փաստաբանների պալատի առջև հավասարության, մրցակցության, կատարված կարգապահական խախտման համար նշանակվող կարգապահական տույժի համաչափության և անմեղության կանխավարկածի սկզբունքների հիման վրա:

Օրենքի 39.1-ին հոդվածի 1-ին մասի 1-ին և 2-րդ կետերի համաձայն՝ փաստաբանի կարգապահական պատասխանատվության ենթարկելու հիմքերն են՝ սույն օրենքի



պահանջների խախտումը, որը կատարվել է դիտավորությամբ կամ կոպիտ անփութությամբ, ինչպես նաև փաստաբանի վարքագծի կանոնագրքի պահանջների խախտումը, որը կատարվել է դիտավորությամբ կամ կոպիտ անփութությամբ:

Օրենքի 39.1-ին հոդվածի 5-րդ մասի համաձայն՝ Փաստաբանը ենթակա չէ կարգապահական պատասխանատվության մեղքի բացակայության դեպքում:

Օրենքի 39.1-ին հոդվածի 6-րդ մասի համաձայն՝ կարգապահական խախտման համար փաստաբանը համարվում է անմեղ, քանի դեռ նրա մեղքն ապացուցված չէ սույն օրենքով սահմանված կարգով՝ Կարգապահական հանձնաժողովի՝ կարգապահական պատասխանատվության ենթարկելու մասին ուժի մեջ մտած որոշմամբ: Փաստաբանի կատարած կարգապահական խախտման վերաբերյալ չփարատված կասկածները մեկնաբանվում են փաստաբանի օգտին:

Օրենքի 1-ին մասի 1-ին կետի համաձայն՝ Փաստաբանների պալատի կարգապահական հանձնաժողովը կարճում է փաստաբանին կարգապահական պատասխանատվության ենթարկելու վերաբերյալ վարույթն այն դեպքում, երբ՝ առկա չէ կարգապահական պատասխանատվության ենթարկելու հիմք:

Ներկայացված նորմերի համադրության և վերլուծության արդյունքում կարելի է փաստել, որ Օրենքով սահմանված են որոշակի վավերապայմաններ, որոնց առկայության դեպքում միայն կարգապահական վարույթի շրջանակներում կարող է քննարկվել փաստաբանին կարգապահական պատասխանատվության ենթարկելու հարցը:

Նշված վավերապայմաններն իրենց հերթին ենթադրում են փաստաբանի վարքագծում Օրենքի և Կանոնագրքի պահանջների խախտման առկայությունը, որը կատարվել է դիտավորությամբ կամ կոպիտ անփութությամբ:

Ընդ որում, նման վավերապայմանների ամրագրումն ինքնանպատակ չէ և ըստ էության նպատակաուղղված է կարգապահական վարույթի իրականացմանը՝ օրինականության, հավասարության, մրցակցության, համաչափության և անմեղության կանխավարկածի սկզբունքների հիման վրա:

Այս համատեքստում, կարգապահական վարույթի շրջանակներում առանձնակի նշանակություն է ձեռք բերում փաստաբանի վարքագծում համապատասխան խախտումների հատկանիշների առկայության ապացուցման հանգամանքը, ինչի անտեսումը կամ չապահովումը թույլ է տալիս եզրակացնել փաստաբանի վարքագծում առերևույթ խախտման հատկանիշների բացակայության մասին, քանի որ դրանք չեն հաստատվել վարույթի ընթացքում: Ըստ այդմ՝ յուրաքանչյուր կողմ պարտավոր է ապացուցել իր կողմից վկայակոչված հանգամանքները, կրում է դրանք ապացուցված չլինելու բացասական հետևանքները, իսկ փաստաբանի կատարած կարգապահական խախտման վերաբերյալ չփարատված կասկածները մեկնաբանվում են վերջինիս օգտին:



Վերոնշյալի հաշվառմամբ, Հանձնաժողովը գտնում է, որ կարգապահական պատասխանատվության հիմք չի կարող լինել միայն ենթադրյալ իրավախախտման մասին դիմողի պնդումը, որը հիմնավորված չէ այնպիսի հանգամանքների վկայակոչմամբ և (կամ) ապացույցներով, որոնք հաստատապես կվկայեն փաստաբանի կողմից Օրենքի կամ Կանոնագրքի պահանջների խախտման կատարման մասին:

Տվյալ դեպքում, փաստաբան Քրիստինե Պետրոսյանին վերագրում է բարեխիղճ իրավական օգնություն ցույց չտալու, ինչպես նաև հանձնարարության կատարման ընթացքի մասին չտեղեկացնելու և իրեն հետաքրքրող հարցերին չպատասխանելու վարքագիծը:

Վերոգրյալի համատեքստում, Հանձնաժողովը անհրաժեշտ է համարում անդրադառնալ, մասնավորապես, հետևյալ հարցին.

- **արդյո՞ք փաստաբան Քրիստինե Պետրոսյանը բարեխիղճ իրավական օգնություն է ցուցաբերել Դիմողին,**
- **արդյո՞ք փաստաբան Քրիստինե Պետրոսյանը ձեռնարկել է ողջամիտ ջանքեր իր վստահորդի հանձնարարությունն արագ և արդյունավետ կատարելու համար,**
- **արդյո՞ք փաստաբան Քրիստինե Պետրոսյանը հանձնարարության կատարման ընթացքի մասին կանոնավորապես տեղեկացրել է Դիմողին և պատասխանել նրան հետաքրքրող հարցերին:**

7.1 Օրենքի 19-րդ հոդվածի 1-ին մասի 1-ին և 2-րդ կետերի և Կանոնագրքի 3.5.5 ենթակետի խախտման մասով

Օրենքի 19-րդ հոդվածի 1-ին մասի 1-ին և 2-րդ կետերի, համաձայն՝ փաստաբանը պարտավոր է՝

1) ազնվորեն և **բարեխիղճորեն** պաշտպանել վստահորդի իրավունքները և օրինական շահերը Հայաստանի Հանրապետության օրենսդրությամբ չարգելված բոլոր միջոցներով ու եղանակներով.

2) պահպանել սույն օրենքի, փաստաբանի վարքագծի կանոնագրքի և փաստաբանների պալատի կանոնադրության պահանջները:

Կանոնագրքի 2.7.2-րդ ենթակետի համաձայն՝ Փաստաբանը պարտավոր է վստահորդին բարեխիղճ իրավական օգնություն ցույց տալ իր մասնագիտական կարողությունների սահմաններում, ինչը ենթադրում է իրավունքի համապատասխան ճյուղի իմացություն, վստահորդի հանձնարարությանը վերաբերող բոլոր հանգամանքների ուսումնասիրություն, հանձնարարության պատշաճ կատարման համար անհրաժեշտ գործողությունների կատարում:

Կանոնագրքի 3.5.5-րդ ենթակետի համաձայն՝ Փաստաբանը պարտավոր է



վստահորդին իրավաբանական օգնություն ցույց տալիս իր մասնագիտական պարտականությունները կատարել ողջամտորեն, **բարեխղճորեն**, որակավորված, սկզբունքայնորեն և **ժամանակին**, ինչը ներառում է՝

ա. նյութերի ուսումնասիրությունը,

բ. վերաբերելի իրավական ակտերի ուսումնասիրությունը,

գ. վստահորդին վերջինիս հանձնարարության կատարման կապակցությամբ հնարավոր իրավական հետևանքների առաջացման մասին իրազեկումը,

դ. վստահորդի հանձնարարության պատշաճ կատարման համար անհրաժեշտ գործողությունների կատարումը:

Համադրելով Օրենքի և Կանոնագրքի նշված ենթակետերը՝ Հանձնաժողովը գտնում է, որ դրանք համակցությամբ մեկնաբանելիս բացահայտվում է փաստաբանի գործունեության բարեխղճության, և հանձնարարության պատշաճ և լրիվ կատարման իրավական բովանդակությունը:

Նշված կանոններով փաստաբանի համար սահմանվում են պարտականություններ, այն է՝ փաստաբանը պարտավոր է ելնել վստահորդի նպաստավոր շահերից և բարեխղճորեն և ժամանակին պաշտպանել վստահորդի իրավունքներն ու օրինական շահերը:

Նշվածը ենթադրում է, որ փաստաբանը պետք է կիրառի օրենքով չարգելված բոլոր հնարավոր միջոցները վստահորդի շահերը լավագույնս պաշտպանելու համար: Ընդ որում, խոսքը վերաբերում է այնպիսի գործողությունների կատարմանը, որոնք փաստացի արդյունավետ կարող են լինել վստահորդի իրավունքների, ազատությունների և օրինական շահերի պաշտպանության պատշաճ ներկայացման համար:

Փաստաբանի մասնագիտական բարձր որակավորումը և իր պարտականությունների բարեխիղճ կատարումը փաստաբանության ինստիտուտի հանրային ընկալման առանցքային տարրերից են, որոնց բացակայությունն արժեզրկում է փաստաբանի՝ որպես իրավապաշտպան և արդարադատության կայացմանը նպաստող գործառույթներ իրականացնող անձի հասարակական նշանակությունը:

Նշվածի հաշվառմամբ, փաստաբանի վարքագծի կանոններով փաստաբանի համար սահմանվում են որոշակի պարտականություններ, այն է՝ ելնել վստահորդի նպաստավոր շահերից, բարեխղճորեն և ժամանակին պաշտպանել վստահորդի իրավունքներն ու օրինական շահերը:

Ավելին, տրված հանձնարարության շրջանակներում փաստաբանը պետք է կիրառի օրենքով չարգելված բոլոր հնարավոր միջոցները վստահորդի շահերը լավագույնս պաշտպանելու համար: Ընդ որում, խոսքը վերաբերում է այնպիսի գործողությունների կատարմանը, որոնք փաստացի արդյունավետ կարող են լինել վստահորդի իրավունքների, ազատությունների և օրինական շահերի պաշտպանության պատշաճ ներկայացման



համար:

Սույն կարգապահական գործում առկա ապացույցներից, ինչպես նաև Դիմողի բացատրություններից պարզ է դառնում, որ Փաստաբանը ստանձնել է Դիմող «ՎԱԼ ՕԹՈՄԵՅՇՆ» ՍՊ ընկերության տնօրեն Վարդգես Գասպարիի իրավունքների պաշտպանությունը թիվ ԵԴ2/2552/02/24 քաղաքացիական գործի շրջանակներում: Կարգապահական վարույթի նյութերից հետևում է, որ Փաստաբանը ստանձնած պարտավորությունների կատարման ուղղությամբ «ՎԱԼ ՕԹՈՄԵՅՇՆ» ՍՊ ընկերության անունից հայց է ներկայացրել ընդդեմ «Գլոբալ Աքսես» ՍՊ ընկերության գումար բռնագանձելու պահանջի մասին:

Դիմողի ներկայացրած թիվ ԵԴ2/2552/02/24 քաղաքացիական գործով «Հայցն առանց քննության թողնելու մասին» դատարանի 11.03.2025թ. որոշմամբ հայցը թողնվել է առանց քննության և արձանագրվել է, որ **պատշաճ ծանուցված Հայցվորը և նրա ներկայացուցիչը 14.11.2024թ. և 11.03.2025թ. նշանակված դատական նիստերին չեն մասնակցել:**

Հանձնաժողովը հաստատված համարելով Փաստաբանի կողմից դատական նիստերին չմասնակցելու հանգամանքը, արձանագրում է, որ վերջինս, ստանձնելով Դիմողի շահերի պաշտպանությունը և ներկայացնելով հայցադիմումը, պարտավոր էր հետագա ընթացակարգային գործողությունները կատարել այնպիսի բարեխղճությամբ և հետևողականությամբ, որը կապահովեր վստահորդի իրավունքների և օրինական շահերի արդյունավետ պաշտպանությունը:

Մասնավորապես, գործի նյութերից հետևում է, որ Փաստաբանը, պատշաճ ծանուցված լինելով 2024 թվականի նոյեմբերի 14-ին և 2025 թվականի մարտի 11-ին նշանակված դատական նիստերի մասին, չի ներկայացել դրանց, իսկ գործի նյութերը չեն պարունակում որևէ ապացույց այն մասին, որ նրա բացակայությունը պայմանավորված է եղել հարգելի պատճառներով կամ որ վերջինս նախապես ձեռնարկել է անհրաժեշտ միջոցներ դատական նիստի հետաձգման, իր բացակայության պատճառների մասին դատարանին տեղեկացնելու կամ վստահորդի շահերի պատշաճ ներկայացումն այլ եղանակով ապահովելու ուղղությամբ:

Արդյունքում, դատարանը, կիրառելով քաղաքացիական դատավարության օրենսդրությամբ նախատեսված իրավական հետևանքը, 2025 թվականի մարտի 11-ի որոշմամբ հայցը թողել է առանց քննության՝ հիմք ընդունելով, որ պատշաճ ծանուցված հայցվորը և նրա ներկայացուցիչը երկու դատական նիստերին չեն ներկայացել:

Հանձնաժողովի գնահատմամբ, Փաստաբանի վերոնշյալ վարքագիծը չի համապատասխանում այն մասնագիտական վարքագծի չափանիշներին, որոնք դատական նիստերին առանց հիմնավորված պատճառի չներկայանալը և որոնց հետևանքով վստահորդի ներկայացրած հայցի՝ առանց քննության թողնվելը վկայում են, որ



Փաստաբանը չի կատարել վստահորդի հանձնարարության պատշաճ կատարման համար անհրաժեշտ բոլոր գործողությունները, չի իրականացրել վստահորդի շահերի բարեխիղճ և ժամանակին պաշտպանությունը և չի ապահովել իրավաբանական օգնության այն որակը, որը պարտավոր էր ցուցաբերել իր մասնագիտական պարտականությունների կատարման ընթացքում:

Ուստի Հանձնաժողովը գտնում է, որ Փաստաբանը չի գործել ջանասիրաբար՝ օրենքի և իրավաբանի մասնագիտության ճանաչված սկզբունքների և էթիկական նորմերի համաձայն, հետևապես՝ Փաստաբանի վարքագծում առկա են Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Կանոնագրքի 3.5.5-րդ ենթակետի պահանջների խախտման հատկանիշներ:

Անդրադառնալով Փաստաբանի ցուցաբերած իրավական օգնության բարեխիղճության հարցին՝ հարկ է նաև արձանագրել, որ Փաստաբանը ստանձնել է Դիմողի իրավունքների պաշտպանությունը նաև քրեական գործի շրջանակներում և համապատասխան հանցագործության մասին հաղորդում է ներկայացրել ՀՀ քննչական կոմիտեի Երևան քաղաքի քննչական վարչության Արաբկիր վարչական շրջանի բաժին:

Փաստաբանի ներկայացրած հաղորդման քննարկման արդյունքում քրեական վարույթ չի նախաձեռնվել, քանի որ հաղորդումը չի համապատասխանել ՀՀ քրեական դատավարության 173-րդ հոդվածի պահանջներին:

Անդրադառնալով Փաստաբանի կողմից ցուցաբերված իրավաբանական օգնության բարեխիղճության հարցին՝ Հանձնաժողովն արձանագրում է, որ Փաստաբանը ստանձնել է Դիմողի իրավունքների պաշտպանությունը նաև քրեական վարույթի շրջանակներում և վերջինիս անունից հանցագործության մասին հաղորդում է ներկայացրել ՀՀ քննչական կոմիտեի Երևան քաղաքի քննչական վարչության Արաբկիր վարչական շրջանի քննչական բաժին:

Կարգապահական վարույթի նյութերից հետևում է, որ ներկայացված հաղորդման քննարկման արդյունքում քրեական վարույթ չի նախաձեռնվել, քանի որ հաղորդումը չի համապատասխանել ՀՀ քրեական դատավարության օրենսգրքի 173-րդ հոդվածի պահանջներին:

Հանձնաժողովն արձանագրում է, որ քրեական վարույթ չնախաձեռնելու վերաբերյալ որոշումն օրենքով սահմանված կարգով ենթակա էր բողոքարկման՝ ինչպես հսկողություն իրականացնող դատախազին, այնպես էլ դատական կարգով: Նշված բողոքարկման ընթացակարգերը նախատեսված են անձի իրավունքների և օրինական շահերի պաշտպանության արդյունավետ միջոցներ ապահովելու նպատակով և, համապատասխան հանգամանքների առկայության դեպքում, կարող են հանգեցնել ընդունված որոշման վերանայման:

Մինչդեռ կարգապահական վարույթի նյութերը չեն պարունակում որևէ ապացույց, որ



մասին, որ Փաստաբանը բողոքարկել է քրեական վարույթ չնախաձեռնելու վերաբերյալ որոշումը, նախաձեռնել է դրա վերանայմանն ուղղված այլ իրավաչափ գործողություններ կամ առնվազն պատշաճ կերպով իրազեկել է վստահորդին նման բողոքարկման հնարավորության, դրա ժամկետների և իրավական հետևանքների մասին:

Հանձնաժողովը չի արձանագրում, որ յուրաքանչյուր դեպքում փաստաբանը պարտավոր էր պարտադիր բողոքարկել քրեական վարույթ չնախաձեռնելու վերաբերյալ որոշումը: Սակայն փաստաբանը, որպես վստահորդի շահերի պաշտպան, պարտավոր էր առնվազն վստահորդին պարզաբանել որոշման բովանդակությունը, բողոքարկման հնարավորությունը, դրա ժամկետները, չբողոքարկելու իրավական հետևանքները և վստահորդի հետ համաձայնեցնել հետագա հնարավոր իրավաչափ քայլերը: Գործի նյութերում նման տեղեկացման կամ համաձայնեցման վերաբերյալ ապացույց առկա չէ:

Հանձնաժողովի գնահատմամբ, նշված անգործությունը, գնահատվելով գործի մյուս հանգամանքների հետ համակցությամբ, վկայում է, որ Փաստաբանը չի ձեռնարկել վստահորդի իրավունքների և օրինական շահերի պաշտպանության համար օրենքով նախատեսված բոլոր անհրաժեշտ և ողջամիտ միջոցները, ինչը չի համապատասխանում Օրենքի 19-րդ հոդվածի 1-ին մասի 1-ին և 2-րդ կետերով, ինչպես նաև Կանոնագրքի 3.5.5-րդ ենթակետով փաստաբանի վրա դրված՝ հանձնարարությունը բարելավճորեն, որակավորված և լիարժեք կատարելու պարտականություններին:

7.2 Կանոնագրքի 3.6.1 ենթակետի խախտման մասով.

Կանոնագրքի 3.6.1 ենթակետի համաձայն՝ փաստաբանը պարտավոր է կանոնավորապես տեղեկացնել վստահորդին հանձնարարության կատարման ընթացքի մասին և պատասխանել նրան հետաքրքրող հարցերին:

Սույն կանոնից բխում է, որ փաստաբանները ոչ միայն կրում են վստահորդին բարելավճոր իրավական օգնություն ցույց տալու, այլ նաև տրամադրված օգնության կամ գործի ընթացքի մասին վերջիններիս տեղեկացնելու պարտականություն: Ընդ որում, փաստաբանի կողմից հենց այս պարտականության կատարումն է, որ հնարավորություն է տալիս վստահորդներին օրինակ տվյալ գործով փոխել իրենց դիրքորոշումը, մոտեցումները կամ նույնիսկ պահանջը: Վերջապես վստահորդի հարցերին պատասխանելը այն ողջամիտ ակնկալիքն է, որ յուրաքանչյուր վստահորդ ունի իր փաստաբանից:

Նշված պարտականությունն իր բնույթով սերտորեն փոխկապակցված է Կանոնագրքի 3.5.5-րդ ենթակետով սահմանված պահանջների հետ, քանի որ վստահորդից հանձնարարության կատարման ընթացքի մասին տեղեկացնելու պարտականությունը ենթադրում է, որ փաստաբանը նախ իրականացնում է հանձնարարությունից բխող համապատասխան գործողություններ, ձևավորում է որոշակի ընթացք, և պետք է, որ այդ



ընթացքի վերաբերյալ անհրաժեշտ տեղեկություններ է հաղորդում վստահորդին:

Այլ կերպ, վստահորդին գործի ընթացքի մասին տեղեկացնելը չի հանդիսանում փաստաբանի գործունեությունից առանձնացված պարտականություն, այլ հանդիսանում է նրա կողմից իրականացվող իրավաբանական օգնության բնական և անհրաժեշտ բաղադրիչը: Հետևաբար, երբ փաստաբանը չի կատարում հանձնարարության պատշաճ կատարման համար անհրաժեշտ գործողություններ, նա ոչ միայն չի ապահովում վստահորդի շահերի արդյունավետ պաշտպանությունը, այլ նաև չի ստեղծում այնպիսի փաստական և իրավական ընթացք, որի մասին կարող էր կանոնավորապես տեղեկացնել վստահորդին:

Սույն գործով արդեն արձանագրվել է, որ Փաստաբանի կողմից չեն ներկայացվել ապացույցներ առ այն, որ վերջինս կատարել է Պայմանագրով ստանձնած պարտավորությունների շրջանակում որևէ առարկայական գործողություն՝ մասնակցել դատական նիստերին, ներկայացրել բողոքներ կամ այլ կերպ գործնականում ձեռնարկել վստահորդի շահերի պաշտպանությանն ուղղված միջոցներ: Նման պայմաններում Հանձնաժողովը գտնում է, որ Փաստաբանի կողմից փաստացի չի ձևավորվել հանձնարարության կատարման այնպիսի ընթացք, որի վերաբերյալ հնարավոր լիներ վստահորդին պարբերաբար և բովանդակային կերպով տեղեկացնել:

Ավելին, Դիմողը նշել է, որ դատարանի 11.03.2025թ. որոշման մասին Փաստաբանը տեղեկացրել է ավելի քան չորս ամիս ուշացումով, իսկ որոշման պատճենը տրամադրել է ավելի քան վեց ամիս ուշացումով:

Դիմողի ներկայացրած նամակագրություններից ուղղակիորեն հետևում է, որ դատարանի 11.03.2025թ. «Հայցն առանց քննության թողնելու մասին» որոշման վերաբերյալ Փաստաբանը Դիմողին տեղեկացրել է միայն 19.07.2025թ., այսինքն՝ որոշման կայացումից ավելի քան չորս ամիս անց: Միաժամանակ, Փաստաբանի կողմից չեն ներկայացվել որևէ ապացույցներ, որոնք կհաստատեն, որ նա մինչև այդ պահը որևէ եղանակով տեղեկացրել է վստահորդին գործի ընթացքի, կայացված դատական ակտի կամ դրա իրավական հետևանքների մասին, ինչպես նաև չեն ներկայացվել ապացույցներ, որոնք կհիմնավորեն նման ուշացման օբյեկտիվ կամ հարգելի պատճառների առկայությունը:

Հանձնաժողովի գնահատմամբ՝ դատարանի կողմից ընդունված և վստահորդի իրավունքների ու օրինական շահերի վրա անմիջական ազդեցություն ունեցող դատական ակտի մասին միայն մի քանի ամիս անց տեղեկացնելը չի կարող համարվել Կանոնագրի 3.6.1-րդ ենթակետով նախատեսված՝ վստահորդին հանձնարարության կատարման ընթացքի մասին կանոնավոր և ժամանակին տեղեկացնելու պարտականության պատշաճ կատարում:

Հետևաբար, վերոնշյալ հանգամանքների համակցված գնահատմամբ Հանձնաժողովը



հանգում է այն եզրակացության, որ Փաստաբանը չի կատարել նաև Կանոնագրքի 3.6.1-րդ ենթակետով իր վրա դրված պարտականությունը:

8. Կարգապահական տույժի ընտրությունը.

Անդրադառնալով նշանակվող կարգապահական տույժի տեսակին՝ Հանձնաժողովն արձանագրում է, որ տվյալ դեպքում առկա է նկատողություն տույժի տեսակը ընտրելու առանձին երկու հիմք:

Օրենքի 7-րդ հոդվածի 2-րդ մասի 4-րդ կետի համաձայն՝ փաստաբանների պալատի խնդիրներն են՝ վերահսկողություն իրականացնել իր անդամների կողմից սույն օրենքի, փաստաբանների պալատի կանոնադրության և փաստաբանի վարքագծի կանոնագրքի պահանջների պահպանման, ինչպես նաև «Փողերի լվացման և ահաբեկչության ֆինանսավորման դեմ պայքարի մասին» Հայաստանի Հանրապետության օրենքի և դրա հիման վրա ընդունված նորմատիվ իրավական ակտերի պահանջների կատարման նկատմամբ.

Օրենքի 39.10 հոդվածի 1-ին մասի համաձայն՝ փաստաբանի կարգապահական պատասխանատվության հարցը քննելուց հետո փաստաբանների պալատի կարգապահական հանձնաժողովը կարող է փաստաբանի նկատմամբ կիրառել կարգապահական տույժերի հետևյալ տեսակներից մեկը, բացառությամբ սույն հոդվածի 3-րդ մասով նախատեսված դեպքի.

1) նկատողություն.

2) խիստ նկատողություն.

3) լրացուցիչ վերապատրաստման դասընթացներին մասնակցել.

4) տուգանք.

5) փաստաբանի արտոնագրի գործողության դադարեցում:

Օրենքի 39.10 հոդվածի 2-րդ մասի համաձայն՝ փաստաբանի նկատմամբ կիրառվող կարգապահական տույժը պետք է համաչափ լինի կատարված խախտմանը: Կարգապահական տույժ կիրառելիս փաստաբանների պալատի կարգապահական հանձնաժողովը հաշվի է առնում նաև խախտման հետևանքները, փաստաբանի անձը, մեղքի աստիճանը, առկա տույժերը, փաստաբանին բնութագրող ուշադրության արժանի այլ հանգամանքներ:

Անդրադառնալով նշանակվող կարգապահական տույժի տեսակին՝ Հանձնաժողովը հաշվի է առնում վերոնշյալ հանգամանքները, այդ թվում՝ խախտման բնույթը, մեղքի աստիճանը, ինչպես նաև Փաստաբանի անձը բնութագրող հանգամանքները: Հանձնաժողովը բազմակողմանի ուսումնասիրել է ստանձնած գործերի արձանագրության Փաստաբանի կողմից իրականացրած գործողությունները և թույլ տված խախտումները: Հաշվի առնելով նշվածը, Հանձնաժողովը փաստաբանի նկատմամբ կիրառում



ամենամեղձ՝ «նկատողություն» կարգապահական տույժը:

Ելնելով վերոշարադրյալից և ղեկավարվելով Օրենքի 11.1-րդ հոդվածի 3-րդ մասի 1-ին կետի, 39-րդ հոդվածի 1-ին մասի, 39.7-րդ հոդվածի 5-րդ մասի 1-ին կետի, 8-րդ մասի և 39.10-րդ հոդվածի 1-ին մասի 1-ին կետի պահանջներով, Հանձնաժողովը՝

Ո Ր Ո Շ Ե Ց՝

1. Փաստաբան Քրիստինե Նիկոլայի Պետրոսյանի (արտոնագիր՝ թիվ 3333) նկատմամբ կիրառել կարգապահական տույժ՝ «նկատողություն»՝ Օրենքի 19-րդ հոդվածի 1-ին մասի 1-ին և 2-րդ կետերի, ինչպես նաև Կանոնագրքի 3.5.5 և 3.6.1 ենթակետերի պահանջների խախտման համար:

2. Հանձնարարել Հանձնաժողովի նիստերի քարտուղարին՝ սույն որոշման մասին իրազեկել կողմերին:

Ծանոթություն. Սույն որոշումը կարող է բողոքարկվել ՀՀ փաստաբանների պալատի խորհուրդ կամ դատական կարգով այն ստանալու օրվանից մեկամսյա ժամկետում: Սույն որոշումն ուժի մեջ է մտնում այն Փաստաբանի կողմից ստանալու հաջորդ օրվանից:

**ՀՀ փաստաբանների պալատի
կարգապահական հանձնաժողովի
նախագահ՝**



Տաթևիկ Շալջյան

**Թիվ ԿԳ-26004-2-Ա
20 մայիսի 2026թ.
ք.Երևան**